

- *1. لیفٹنٹ گورنر منوج سنہا نے کہیو ہے جے گورو تیغ بہادر جی قربانی تے انسانی پہائی چارہ غی اک مجسم تصویر تھا تے ہم نانہ اُن غی تعلیمات ور عمل کرن غی لوڑ ہے۔
- *2. شمالی کمان غا کمانڈر لیفٹنٹ جرنل پراتک شرما نے جموں خطہ مانہ اُبھرتی دہشت گردی غے خلاف پیشگی اقدام کیا جان غی ضرورت ور زور دتو ہے ۔
- *3. مرکزی وزیر ڈاکٹر جتندر سنگھ نے ضلع کٹھوعہ غا رامکوٹ علاقہ مانہ منعقد کیا گیا ایکٹا مارچ مانہ شرکت کی ہے ۔
- *4. جموں مڈ ناٹ مراٹھ غا تیجہ مرحلہ نانہ کامیابی سنگ منعقد کیو گیو ہے ۔
- *5. تے مردہ غا ضمیرہ غا 2 ٹیسٹ مقابلان غا سلسلہ غا پہلا مقابلہ مانہ جنوبی افریقہ نے بھارت نانہ 30 دوڑان سنگ برا دتو۔

خبران غی تفصیل نال پہلان باغ علی طاہر۔

LG Nagar Kirtan

لیفٹنٹ گورنر منوج سنہا نے اج گورو تیغ بہادر جی غا 350 واں یوم شہادت غا موقع ور منعقد کیا گیا نگر کیرتن مانہ شرکت کی۔ اس موقع ور اک عوامی اکٹھ سنگ خطاب کرتا واں اُنہاں نے کہیو جے گورو جی قربانی تے انسانی پہائی چارہ غی اک مجسم تصویر تھا ،تے ہم نانہ اُن غا امن تے ہم آہنگی بارے دسیا گیا رستہ نانہ اختیار کرن غی لوڑ ہے ۔ اُنن غو کہنو تھو جے مہارا سیکھ گورو صاحبان نے اپنا نمایاں کردار تے بے لوث قربانیاں غے ذریعے بھارت غی شان اُچی کی ہے ۔ لیفٹنٹ گورنر غو کہنو تھو جے بھارت صدیاں تیں کیا گیا غیر ملکی حملان تے اقتصادی لوٹ کھسوٹ غے باوجود آجوں وی دُنیا مانہ مکمل طاقت تے فخر سنگ گھلو ہے ۔ اُنہاں نے زور دیتاں واں کہیو جے مہارا خواہاں غو نوو بھارت تعمیر کیا جان غی خاطر ہم نانہ مضبوطی تے عظم سنگ کھلاں رہن غی لوڑ ہے ۔ اُنہاں نے کہیو۔۔ بانٹ۔۔

Army Cmdr

شمالی کمان غا فوجی کمانڈر لیفٹنٹ جرنل پراتک شرما نے بسنت گڑھ تے رام پور غو دورو لاغے دہشت گردی مخالف تیاریاں غو جائزولیاں ۔ اُنہاں نے اندرونی علاقان مانہ دہشت گردی غی اُبھرتی سرگرمیاں ور نظر رکھن تے خبردار رہن غی ضرورت ور زور پایو۔ اپنا دورہ غے دوران اُنہاں نے جوانان سنگ وی ملاقات کی، تے اُن غا پیشہ وارانہ کردار اور جموں کشمیر نانہ دہشت گردی تیں پاک رکھن غا اُن غا عظم غی سراہنا کی۔ واضع رہ جے ادھم پور ضلع غا بسنت گڑھ تے رام پور علاقان مانہ گذشتہ 2 بہراں غے دوران دہشت گردی غا کئی واقع پیش آیا ہیں۔

Jitendra Singh

وزیر اعظم نریندر مو دی تیں متاثر ہو غے سردار ولہہ بھائی پٹیل غا 150 واں جنم تیہاڑہ نانہہ منان غی خاطر ضلع کٹھوعہ غا رام کوٹ چھلاں تے گلک علاقہ مانہہ اکھنڈ بھارت غا پیغام سنگ سردار ایٹ 150 غا ناں سنگ ایکتا مارچ کڈیو گیو۔ مرکزی وزیر ڈاکٹر جتندر سنگھ جہیڑا اس مارچ مانہہ شرکت کر رہیا تھا۔ انہاں نے بی جے پی کارکنان تے عام لوکاں غو بڑی سرگرمی سنگ خیرمقدم کیو۔ یوہ مارچ بلاروک ٹوک آئندہ 26 نومبر توڑی جاری رہ گو۔ ایم ایل اے بلاور ستیش شرما غی قیادت مانہہ بلاور مانہہ کڈھیا گیا اس مارچ مانہہ وی خاصی تعداد مانہہ مقامی لوکاں نے شرکت کی۔

Leopard Dead

ضلع پونچھ مانہہ قبضہ لکیر غے نیڑے جنگلاتی علاقہ مانہہ گذشتہ کل اک تیندو مردہ حالت مانہہ پایو گیو۔ آکاشوانی جموں غا نامہ نگار نے خبر دتی ہے جے یوہ تیندو منکوٹ غا بلنوی جنگلاتی علاقہ مانہہ جنگلات محکمہ غی اک ٹیم نے برآمد کیو۔ تے منیو جا رہیو ہے یوہ تیندو زمینی سرنگ غا پھٹن غی وجہ سنگ ہلاک ہو گیو ہے۔ واضح رہ جے سرحد ور در اندازی غی کو ششاش نانہہ روکن واسطے اس طرح غی سرنگ بنائی جائیں۔ ہلاک شدہ اس تیندوہ نانہہ جنگلاتی زندگی غا تحفظ بارے محکمہ نانہہ پوسٹ مارٹم تے ٹھکانے لان غی خاطر سپرد کیو گیو۔

Ramban Sehkar Mela

کواپرٹیو سوسائٹی رام بن غی طرفوں امداد باہمی غی کاروائیاں مانہہ باندو کر تے مقامی پیدہ کرن غا ارادہ سنگ سالانہ سہ کار میلہ غو انعقاد کیو جا رہیو ہے۔ اس میلہ غے دوران کو اپرٹیو سکیمیں تربیت مہیا کران تے کسانان نانہہ اُن غی پیدہ وار غی خاطر پلیٹ فارم میسر کران غا سلسلہ مانہہ جانکاری دتی جائیگی۔ میلہ غے دوران خود امدادی گروپاں نانہہ براہ راست صارفین سنگ ملاقات کرن غو موقع وی میسر آسکے گو۔ میلہ غے دوران ملاقاتی نشست تے نمائش وی لائی جائیں گی۔ تانجے کواپرٹیو غا سماجی ترقی تے قومی تعمیر مانہہ کردار نانہہ اُجاگر کیو جا سکے۔ اس سلسلہ مانہہ مزید جانکاری دے رہی ہیں ڈپٹی رجسٹرار کو اپرٹیو سو سائٹی رام بن پرینکا شرما۔۔۔ بانٹ۔

مزید خبراں نال محمد اکرم چودھری ور اُس تیں پہلاں یوہ پیغام۔(یہ خبر تم آکاشوانی جموں تیں سُن رہیا ہیں، تے یہ خبر مہاری ویب سائٹ نیوز آن آنیر ڈاٹ گوو ڈاٹ ان ور وی دستیاب ہیں، اس (تیں یہ خبر مہاری موبائل ایپ تے ڈی ٹی ایچ ور وی دستیاب ہیں

Mid Night Marathon

جے اینڈ کے سپورٹس کونسل نے ریل ٹائم سپورٹس غا تعاون سنگ گذشتہ رات تے آج سویرے کامیابی سنگ جموں مڈ ناٹ مراٹھ گو اہتمام کیو۔ اس دوڑ گا دوہاں مرحلاں مانہہ بڑی تعداد مانہہ لوکاں نے شرکت کرتاں واں جسمانی چُستی، کھیڈ غا جذبہ تے سماجی ایکتا غو مظاہر کیو۔ آکاشوانی جموں غا نمائندہ نے خبر دتی ہے جے اس میراتھن دوڑ غا انعقاد کاراں غو کہنو ہے جے اس دوڑ غو مقصد صحت نانہہ مضبوط بنانو، سرگرم زندگی بارے حوصلہ افزائی کرنو تے علاقہ گا کھڈاریاں مانہہ اتحاد پیدہ کرنو ہے۔ یاہ دوڑ مولانہ آزاد سٹیڈیم تیں شروع ہو غے شہر غا اہم رستاں تیں گزری۔ 42 کلو میٹر تے 21 کلو میٹر غی ان دو مرحلاں غی دوڑاں نانہہ گذشتہ

رات ساڈا 11 بجے روانہ کی گئیں، جد کہ 10 کلو میٹر اور 5 کلو میٹر غی دوڑ آج سرگی 5 بجے شروع کی گئیں۔ اس بارے گل کرتاں واں کھیڈ محکمہ غا وزیر ستیش شرما نے کہیو۔۔ بانٹ

Tribal Seminar

جواہر لعل نہرو یونیورسٹی غا گجر بکروال ٹرائبل اکیڈمی فورم غی طرفو جن جاتیا گورو دیو س غا موقع ور فتح علی سروری کسانہ غی زندگی اُسب تے ورثہ غی بحالی بارے آواز غا عنوان ور مبنی اک سیمینار منعقد کیو گیو۔ اس موقع ور کئی دانشوراں، لکھاڑیاں تے اعلیٰ افسراں نے شرکت کی، جنہاں نے معروف دانشور، شاعر، صحافی تے سماج سڈھا ر فتح علی سروری کسانہ غا ادبی کردار، زمینی سطح غی سرگرمیاں مانہ اُن غی شمولیت تے پائیدار ورثہ ور کیو۔ سیمینار غے دوران معروف مقرران نے اس عنوان ور پُر اثر تقریر کی۔ جن مانہ ڈاکٹر آنل کمار سنگھ اسسٹنٹ پروفیسر جے این یو ڈاکٹر اشتیاق احمد شاق تے ایڈووکیٹ آنور چودھری شامل ہیں۔

IED Rajouri

جموں کشمیر مانہ حفاظتی فوج نے بار آلے تہاڑے سرحدی ضلع راجوری مانہ اک آئی ای ڈی برآمد کیو۔ اور بعد مانہ اُس نانہ تباہ کر دتو۔ مہارہ نامہ نگار نے اطلاع دتی ہے جے ضلع غا تھنہ منڈی سب دویزن غا اپر بگئی گراں مانہ ہون آلا دھماکہ مانہ اک مکان نانہ جزوی طور نقصان پُجیو ہے۔ حکام غے مطابق اک سکیورٹی گشتی نانہ گھر غے نیڑے آئی ای ڈی ملی۔ اور بم نکارہ بنان آلی ٹیم نانہ بلايو جن نے کنٹرول دھماکو کر غے آئی ای ڈی نانہ ناکارہ بنا دتو۔

Cricket Ind vs SA

بھارت تے جنوبی افریقہ غے بشکار کھیڈی جارہی 2 ٹیسٹ میچاں غی ٹیسٹ سیریز غا پہلاں مقابلہ مانہ جنوبی افریقہ نے ایڈن گارڈن کولکتہ مانہ بھارت نانہ 30 دوڑاں نال شکست دے دتی ہے۔ جنوبی افریقہ غی طرفوں دتا گیا 124 دوڑاں غا بدف غو پچھو کرتاں واں بھارت غی ٹیم 93 دوڑاں ور آئوٹ ہو گئی۔ بھارتی کپتان شبھمن گل گذشتہ کل لگی چوٹ غی وجہ نال اِج بلے بازی نہیں کر سکیا۔ اس تیں پہلاں اِج سویرے جنوبی افریقہ نے کل غا سکور 93 دوڑاں ور 7 وکٹاں تیں اگے کھیلنو شروع کیو تے 153 دوڑاں ور پوری ٹیم آئوٹ ہو گئی۔ جس مانہ کپتان ٹیمبا بووما نے شاندار 55 دوڑ بنائیں تے وے ناآباد رہیا۔

Rajouri Volleyball

راجوری غا کیری سیکٹر مانہ سرحد غے نیڑے نوجواناں غے درمیان کھیڈیا جارہیا بین گراں والی بال ٹورنامنٹ جس غو اہتمام بھارتی فوج غی طرفوں کیو گیو تھو اِج اختتام پزیر ہو گیو ہے۔ یاہ تقریب سول ملٹری ملاپ آلے پاسے بھارتی فوج غا مستقل عزم غی عکاسی کرے۔ جہیزو خطہ مانہ مقامی لوکاں غے نال مضبوط اور مثبت تعلقات نانہ فروغ دے۔ یہ اقدامات حقیقی ترقیاتی اثرات پیش کریں اور نوجواناں نانہ باختیار بنان اور برادری غی ترقی واسطے نویں راہ پیدا کریں۔ فوج سرحدی نوجواناں نانہ منشیات تیں دور رکھن غا مقصد نال اس طرح غا کھیڈاں غا مقابلان غو انعقاد کرتی رہ۔ فوج غا ان اقدامات غی تعریف کرتاں واں اک مقامی شخص نے اس طرح کہیو۔۔ بانٹ۔۔
